

Le ultime fadie di Marzi

il professôr Strassolt nus à lassâts ai 5 di Zenâr. Il so ultim impegn a pro de lenghe al è stât il libri "Economia delle minoranze linguistiche".

» DI FLAVIO VIDONI

Il professôr Marzi Strassolt nus à lassâts ai 5 di Zenâr. Une grave pierdite pe culture furlane. Za docent di Statistiche economiche te Universitât di Udin daspò vè davuelte une interie cariere academiche te Universitât di Triest, al à esercitât la cariche di magnific retôr dal Ateneu furlan intai agns dal so disvilup, prime di vignî elet ae presidence de Provincie di Udin. Za fondadôr, al jere ancjemò lui il president de Societât Sientifiche e Tecnologjiche Furlane, ven a stâi di chê clape di inteletuâi che a nudrissin pe lenghe furlane une stime tâl, tant di considerâle in grât di fevelâ des materiis plui altis e dificilis.

L'amôr pe lenghe furlane al jere di date viere par Strassolt. Intal cjistiel aes puartis di Çarvignan là che al è nassût, là che al à vivût e là che al è muart ae etât di 77 agns, il furlan al



Marzi Strassolt

jere la lenghe di famee.

Il so ultin impegn a pro de lenghe furlane, ma ancje di dutis chês altris lenghis che a combatin pe sorevivenca, al è stât il libri "Economia delle minoranze linguistiche. La tutela della diversità come valore", jessût l'an passât par Carrocci editore di Rome.

“A son stadis une vore trascuradis lis causis di nature economiche che a metin a risi la sorevivenca des piçulis lenghis

Strassolt al à sintût la dibisugne di chest libri parcè che a son lis trasformazions, che si realizin intes fundamentis economicis des minorancis linguistichis e inte rê di rapuarts là che chestis a vegnin inseridis, che a zuin une part impuartante intal creâ dificoltàs ancje relevantis ae conservazion des carateristichis identitariis e des conotazions linguistichis originâls di une popolazion. "A son stadis une vore trascuradis lis causis di nature economiche che a metin a risi la sorevivenca di patrimoniis linguistics di grande impuartance pe culture di un País e di une realtât internazionâl" al scriveve Strassolt e seont lui i tocje ae "ricercje economiche" dâ spiegazions "sul parcè des dificoltàs che lis piçulis lenghis a cjatin su la lôr strade e mostrâ soluzions par otignî obietîfs di conservazion, mantigniment e svilup da lis lenghis di minorance".

Dopo vè spleât parcè che si pues considerâ la lenghe come ben economic e il valôr economic de lenghe in gjenerâl, l'obietîf di Strassolt si strenç

su la misure economiche des minorancis linguistichis e sul valôr de lenghe minoritarie.

Ve in rie spleadis lis dinamichis des minorancis linguistichis, la domande e la ufierte di bens linguistics e lis relazions spaziâls là che chestis si misurin cul dulintor, par rivâ insom a tratâ des politicis linguistichis e ae lôr valutazion.

Il Friûl, par Strassolt, al è un osservatori privilegjât par studiâ lis relazions tra une minorance linguistiche e lis maiorancis che i stan ator e al è di chi che al partîs il volum che al intint dâ un contribût ae cognossince dai rapuarts complès tra lis cundizions linguistichis di une region, la sò strutture e lis relazions economicis che la tegnin sù.

✉ redazione@ilfriuli.it

SCOLTADIS DI DRIUS

Aniversari

Chel mès ch'al ven al cole el gno aniversari di matrimoni... E a pensai ben anche chel de me femine.

